

LESJA KOMMUNE
Postboks 53
2671 LESJA

Dykkar ref.:
2023/1883-34

Vår ref.:
Sak/dok.: 12/05382-68
Ark.: 326.12

Dato:
11.07.2025

Oppstart av namnesak 2025/116 – sætri/setre mfl. – Lesja kommune

I samband med adressering i Lesja kommune har kommunen kontakta Kartverket og teke opp namnesak for ei lang liste med stadnamn for å få skrivemåten betre i samsvar med lokal bruk, jf. brev datert 19.12.2024. Kartverket nyttar samstundes høvet til å reisa namnesak for nokre fleire namn som har skrivemåtestatusen 'føreslege' eller 'uvurdert' i Sentralt stadnamnregister (SSR). Saka vert teken opp for å få avklart rett skrivemåte for offentleg bruk.

Statens kartverk sender med dette saka på lokal høyring i kommunen, jf. § 8 i lov om stadnamn. I tillegg til primærnamna tek me avleidde namn med i saka, jf. § 8 siste ledd i forskrift om stadnamn.

Det går fram av den vedlagde lista kva for namn som er med i saka.

For fleire opplysningar om namna, sjå innsynsløysinga vår for SSR: www.norgeskart.no/ssr/. Somme bruksnamn står berre i matrikkelen og kan søkjast opp i <https://seeiendom.kartverket.no> Søk på: gnr./bnr., namnet på kommunen.

Samlevedtak

I samsvar med kommunen sitt ynske gjer Kartverket allereie no i samband med dette høyringsbrevet samlevedtak for eit utval av namn der det tidlegare har vore namnesak for tilsvarende namneledd. Dette gjeld nokre namn som endar på *-botn/-botnen/-botten*, som no får skrivemåten *-botnen* i samsvar med norsk rettskriving, og nokre namn som får skrivemåten *-e* der det tidlegare har vore brukt *-i*. Dette vedtaket er det klagerett på, sjå nedanfor.

Lokal høyring

Kartverket har vedtaksrett for skrivemåten av m.a. naturnamn, nedervde gards- og bruksnamn, seternamn og statlege anlegg. Før me gjer vedtak, har kommunen rett til å uttala seg. Eigarar og festarar har rett til å uttala seg om gardsnamn og bruksnamn, og lokale organisasjonar har rett til å uttala seg om skrivemåten av namn som dei har særleg tilknytning til. **Saker som gjeld bruksnamn, skal eigarane få tilsende direkte frå kommunen.** Det går fram av den vedlagde lista kva for nokre bruk dette gjeld. Alle høyringssvar bør vera grunngjevne.

Etter lova skal skrivemåten fastsetjast med utgangspunkt i den nedervde, lokale uttalen av namnet. Difor bed me om at alle som uttalar seg, opplyser kva som er den lokale dialektuttalen. Dersom namnet vert uttalt på ulike måtar, bed me om å få opplyst dei forskjellige uttaleformene.

Normeringsprinsipp

I tillegg til å ta utgangspunkt i den nedervde, lokale uttalen, skal ein som hovudregel fylgja gjeldande rettskrivingsprinsipp ved normering av stadnamn, jf. § 4 fyrste ledd i lov om stadnamn. Skrivemåten skal vera praktisk og ikkje skyggja for meiningsinnhaldet i namnet. I *utfyllande reglar om skrivemåten av norske stadnamn* er det meir detaljerte føresegner om korleis stadnamn skal normerast.

Skrivemåten av primærnamnet vil normalt vera retningsgjevande for skrivemåten av det same namnet i andre funksjonar, t.d. for adressenamn som er like eller avleidde av namnet, jf. § 4 tredje ledd i lova. Kommunen må difor setja på vent eventuelt pågåande saker som gjeld adressenamn og adressetilleggsnamn, der dei same namna inngår, til det er gjort vedtak om skrivemåten av primærnamnet. Kommunen må ta omsyn til den vedtekne skrivemåten av primærnamnet når dei skal gjera vedtak.

Bruksnamn

Vedtak om skrivemåten av gardsnamn skal som hovudregel vera retningsgjevande for skrivemåten av bruksnamn som er identiske med gardsnamnet, eller der gardsnamnet går inn som ein del av bruksnamnet. Men etter § 5 tredje ledd i lov om stadnamn har eigaren rett til å fastsetja ein annan skrivemåte av namnet på eige bruk enn den som fylgjer av § 4 fyrste ledd i lova. Føresetnaden er at han/ho kan dokumentera at skrivemåten har vore i offentleg bruk som bruksnamn (på offentleg kart, på skilt, i matrikkelen, skøyte e.l.). I så fall må eigaren senda krav til Kartverket og leggja ved slik dokumentasjon. Klageretten for namnet i andre funksjonar, t.d. gardsnamnet, fell då bort. Kartverket er formelt vedtaksorgan også for skrivemåten av bruksnamn fastsette av eigaren.

Vidare saksgang

Kommunen har ansvaret for å kunngjera at namnesaka er reist, t.d. med notis i ei lokalavis og på nettsidene sine. Kommunen har òg ansvaret for å henta inn og samordna dei lokale høyringssvara. Dei skal sendast til *Språkrådet, Postboks 1573 Vika, 0118 Oslo (post@sprakradet.no)*, med kopi til Kartverket. **Kommunane Dovre, Lom, Skjåk og Rauma må gjera det same for namna som ligg heilt eller delvis i dei kommunane. Det går fram av den vedlagde namnelista kva namn det gjeld.** Språkrådet vil så gje endeleg tilråding til Kartverket. Kvar av partane (inkl. kommunen) har to månader på seg til å gje høyringssvar frå dei får brevet. Sidan dette er ei omfattande sak, og dette høyringsbrevet går ut i sommarferien, gjev me kommunen fire månader til å gjennomføra den lokale høyringa.

Kommunen må òg kunngjera samlevedtaket som fylgjer med dette brevet. Partane får tre vekers klagefrist frå tidspunktet dei får vedtaket kunngjort lokalt. Me gjev kommunen forlengd klagefrist til fire månader frå datoen på dette brevet, dvs. same frist som for gjennomføring av den lokale høyringa.

For opplysningar om saksgang, kontakt Kartverket på telefon 32 11 80 00. For namnefaglege spørsmål, kontakt Språkrådet på telefon 22 54 19 50.

Venleg helsing

Erlend Trones
namneansvarleg

Dokumentet vert sendt utan underskrift. Det er godkjent i samsvar med interne rutinar.

Lenkjer: [Lov om stadnamn](#)
[Forskrift om stadnamn](#)
[Utfyllande reglar om skrivemåten av norske stadnamn](#)

Kopi LOM KOMMUNE
DOVRE KOMMUNE
SKJÅK KOMMUNE
RAUMA KOMMUNE

Vedlegg: Namneliste til høyring
Samlevedtak om *-botnen* og endinga *-e* i sterke hokjønnsord

Kopi LOM KOMMUNE
DOVRE KOMMUNE
SKJÅK KOMMUNE
RAUMA KOMMUNE